

大正藏第 08 册 No. 0242

佛说徧照般若波罗蜜经 1 卷

No. 242 [Nos. 240, 241, 243, 244]

佛说徧照般若波罗蜜经

西天译经三藏朝散大夫试鸿胪卿传法大师臣施护奉 诏译

如是我闻：

一时世尊，得一切如来金刚三昧智，得一切如来种种具足最上宝冠，得一切如来大自在相应金刚智，受三界灌顶一切如来智印，乃至圆满一切众生所欲之愿，种种变化，大明平等智慧，此大毘卢遮那常住三世平等一切如来金刚身语意业，称赞一切如来。

尔时世尊住欲界他化自在天宫，而此宫殿以种种妙色大摩尼宝，种种真珠瓔珞，种种幢幡宝盖，悬挂种种宝铃，如是具足一切庄严。有菩萨摩訶萨众，其名曰：金刚手菩萨、观自在菩萨、虚空藏菩萨、金刚拳菩萨、发同心转法轮菩萨、誑誑曩嚧惹菩萨、破一切魔王菩萨、文殊师利菩萨。如是等六十八俱胝菩萨摩訶萨众，恭敬围绕而为说法。初善中善后善，其义深远其语巧妙，纯一无杂具足清白，宣说菩萨一切清静法门：「若诸有情于欲清静，是菩萨故；爱缠清静，是菩萨故；一切行清静，是菩萨故；见性清静，是菩萨故；爱乐清静，是菩萨故；贪清静，是菩萨故；瞋清静，是菩萨故；痴清静，是菩萨故；藏清静，是菩萨故；文字清静，是菩萨故；意乐清静，是菩萨故；观清静，是菩萨故；身清静，是菩萨故；语清静，是菩萨故；意清静，是菩萨故；色清静，是菩萨故；声清静，是菩萨故；香清静，是菩萨故；味清静，是菩萨故；触清静，是菩萨故。于意云何？一切法自性空自性清静，般若波罗蜜亦自性空自性清静。」

佛告金刚手菩萨：「于此般若波罗蜜一切清净法门，有秘密卍字摄尽一切法。」

佛告金刚手菩萨：「一切清净法门般若波罗蜜，若人于此听受读诵，彼人即入菩提道场，所有业障、报障、烦恼障，地狱恶趣及一切盖缠，皆悉不生，一切苦恼皆悉灭尽。若复有人日日受持读诵一心思惟，彼人现生得一切法平等金刚三昧，得一切自在爱乐安乐，入菩萨位，速证佛果，是故得名持金刚佛。如是所说一切法行，摄入秘密卍字义门。」

尔时遍照如来告金刚手菩萨：「此般若波罗蜜经，说一切如来寂法菩提。所谓：金刚平等菩提；金刚坚固义平等菩提；一义法坚等菩提；一切法自性清净菩提。皆是大菩提，能除一切妄想等。若有人听受读诵恭敬供养，所有一切罪障皆得消除，乃至得坐菩提道场，速证阿耨多罗三藐三菩提。如是所说一切法行，摄入秘密卐字义门。」

尔时释迦如来，为调伏一切恶，说一切法平等最胜般若波罗蜜经：「贪所戏论应见其贪；痴所戏论应见其痴；一切法戏论应见一切法。般若波罗蜜应如是知。如是所说一切法行，摄入秘密[牟*含]字义门。」

佛告金刚手菩萨：「若有人于此般若波罗蜜，听闻受持读诵忆念，假使彼人杀尽三界一切众生，彼所造罪无量无边，以此持诵功德之力速得消除，当证阿耨多罗三藐三菩提。如是所说一切法行，摄入秘密卍字义门。」

尔时自性清净如来，复说一切法聚集观自在智印般若波罗蜜经：「世间一切贪清净故，一切瞋清净，一切垢清净，一切罪清净，一切众生清净，一切法清净，一切智清净，般若波罗蜜清净。」

佛告金刚手菩萨：「若有人于此般若波罗蜜，听闻受持读诵忆念，彼人虽在一切贪欲泥中，贪欲烦恼而不能染，如红莲华淤泥不着故，如是不久当成阿耨多罗三藐三菩提。」

尔时一切三界主如来，说一切如来灌顶生智藏般若波罗蜜经：「若施灌顶，当得三界之内一切王身；若施利行，当得所欲之愿一切圆满；若以法施，速证一切平等之法；若以财施，于身口意一切快乐。如是所说一切法行，摄入秘密怛览字义门。」

尔时得一切智印常持一切密法如来，说一切如来住金刚智印般若波罗蜜经：「若受一切如来身印，即成就一切如来；若受语印，即成就一切法门；若受心印，即成就一切三摩地；若受金刚印，即成就一切如来最上金刚身口意业。」

佛告金刚手菩萨：「若有人于此经中，听闻受持读诵思惟，彼人速得成就具足富贵，速得成就金刚身口意密，不久证成最上阿耨多罗三藐三菩提。如是所说一切法行，摄入秘密恶字义门。」

尔时一切法戏论如来，说转轮字般若波罗蜜经：「一切法无性故无相，一切法无相故无作，无作故无愿，无愿故一切法本来清净，般若波罗蜜清净。如是所说一切法行，摄入秘密暗字义门。」

尔时一切内轮如来，说入大轮般若波罗蜜经：「若入金刚平等故，亦得入一切如来轮；若利金刚平等入故，亦得入一切大菩萨轮；若法平等入故，亦得入一切法轮；若入一切平等故，亦得入一切轮。如是所说一切法行，摄入秘密嚙字义门。」

尔时一切供养仪广大生如来，说一切如来最上供养般若波罗蜜经：「发菩提心，广伸供养一切如来；救度一切众生，令受一切如来妙法，书写供养受持读诵；复得一切如来广大供养。如是所说一切法行，摄入秘密唵字义门。」

尔时平等调伏一切如来，说金刚手调伏一切众生正智藏般若波罗蜜经。说：「一切众生平等故瞋亦平等；一切众生调伏故瞋亦调伏；一切法平等故瞋亦平等；一切众生平等故金刚亦平等。于意云何？为菩提故，如是调伏一切众生。如是所说一切法行，摄入秘密憾字义门。」

尔时住一切法平等如来，说最上一切法平等般若波罗蜜经。说：「一切平等故，般若波罗蜜亦平等；一切利故，般若波罗蜜亦利；一切法故，般若波罗蜜亦法；一切业故，般若波罗蜜亦业。如是所说一切法行，摄入秘密纒凌字义门。」

尔时世主如来，说一切众生住般若波罗蜜经：「一切众生如来藏，即普贤大菩萨藏，一切自性故；即金刚藏，金刚灌顶故；即法藏，转一切语故；即业藏，作一切方便事故。如是所说一切法行，摄入秘密纒凌字义门。」

尔时无量无边究竟如来，住无边究竟法，说一切法住平等究竟金刚般若波罗蜜经：「般若波罗蜜无边故，一切如来亦无边；一切如来无边故，般若波罗蜜亦无边；乃至般若波罗蜜如一故，一切法如一；般若波罗蜜究竟故，一切法亦究竟。」

佛告金刚手菩萨：「若有人于此般若波罗蜜，听闻受持读诵忆念，彼人得入究竟清净菩萨行位，一切盖障究竟不生，即得名为持金刚如来。如是所说一切法行，摄入秘密毘焰字义门。」

尔时大遍照如来，得一切如来秘密法，悟一切戏论法，说大乐不空金刚三昧平等般若波罗蜜经：「最上法门，本来无物，无上中下，若能成就一切如来菩提法乐，降伏魔怨，三界自在，乃至救度一切众生，令得最上利乐，是即名为大地菩萨。如是所说一切法行，摄入秘密娑鍘字义门。」

「复次，金刚手菩萨！彼大菩萨乃至住在轮回，亦作一切利益度诸众生。一住方便智慧，所作事业悉得清净，贪欲烦恼皆不能侵，如莲在水淤泥非染，自在安乐坚固不退。如是所说一切法行，摄入秘密贺字义门。」

「复次，金刚手菩萨！若人于此般若波罗蜜经，正心思惟日日读诵，乃至随喜听闻，是人得一切快乐，复能成就金刚三昧不空大乐。如是所说一切法行，摄入秘密吽字义门。」

尔时世尊遍照如来，白金刚手大秘密主言：「我今复说二十五种般若波罗蜜秘密法门。汝今谛听！真言曰：

「唵(引)曩谟萨哩嚩(二合)没驮冒地萨埵喃(引)

「唵(引)冒地唧多嚩日哩(二合)

「唵(引)稣啰多娑怛鍘(三合)

「唵(引)三满多跋捺啰(二合)左哩也(二合)尾部摩儂

「唵(引)阿儂嚩提

「唵(引)惹(引)底尾嚩哩帝(二合、引)

「唵(引)摩贺(引)啰(引)誡达哩弥(二合、引)
 「唵(引)尾哩也(二合)迦嚩啻(去)
 「唵(引)萨哩嚩(二合)誡(引)弥
 「唵(引)嚩日罗(二合)捺哩(二合)茶迦嚩左啻帝(引)吽(引)
 「唵(引)萨哩嚩(二合)怛他(引)誡帝(引)
 「唵(引)莎婆(引)嚩戍提
 「唵(引)达哩摩(二合)多(引)倪也(二合)曩尾戍驮
 「唵(引)迦哩摩(二合)尾输达儂吽(引)
 「唵(引)儂逊婆嚩日哩(二合)尼吽[口*發]咤(半音)
 「唵(引)迦(引)摩啰(引)儂
 「唵(引)惹(引)贺嚩日哩(二合、引)
 「唵(引)萨哩嚩(二合)那(引)曳儂
 「唵(引)纒凌(二合)
 「唵(引)阿迦(引)啰目契(去)
 「唵(引)钵啰(二合)倪也(二合)波(引)啰弥帝(引)惹敢(切)昂吽(引)
 「唵盎唵(引)萨哩嚩(二合)怛他(引)誡多迦(引)野誡哩(二合、引)
 「唵(引)萨哩嚩(二合)怛他(引)誡多嚩(引)尾输驮儂
 「唵(引)萨哩嚩(二合)怛他(引)誡多啻多缚日哩(二合、引)阿(入)
 「唵(引)三尾(引)誡野萨哩嚩(二合)萨埵喃谟叉野萨哩嚩(二合)播(引)野誡帝(引)毘也(二合)萨哩嚩(二合)三摩野嚩日啰(二合)吽怛啰(二合)咤(引音)」

尔时世尊说此真言已，告金刚手菩萨言：「如是印呪，能破一切罪暗，能作一切吉祥，一切如来金刚秘密最上成就。若人得此，持诵听闻，是即名为持金刚清净如来。若有众生于此般若波罗蜜经，受持读诵随喜听闻，是人已曾于无量佛所，种诸善根植众德本。

「复次，金刚手菩萨！若人闻此般若波罗蜜经一四句偈，得八万俱胝那由他恒河沙等如来恭敬供养，何况解义为他演说。彼人持经之处，如佛塔庙，一切天、人、阿修罗等恒来作礼。若人流通此经展转读诵，获宿命智，能知过去俱胝劫事，一切众魔诸恶患难皆不能侵，常有四大天王及诸贤圣而作卫护。彼人临命终时心不颠倒，一切诸佛及大菩萨俱来迎接，十方净土随意往生。

「复次，金刚手菩萨！如是般若波罗蜜经圣要法门，成就如是最上法行胜妙功德。」

佛说是经已，金刚手菩萨摩訶萨，及天、人、阿修罗、干闥婆等，皆大欢喜，信受奉行。

遍照般若波罗蜜经

【经文信息】大正藏第 08 册 No. 0242 佛说遍照般若波罗蜜经

【版本记录】CBETA 电子佛典 Rev. 1.19 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】维习安大德提供之高丽藏 CD 经文 / 佛教计算机信息库功德会校对，CBETA 自行扫描辨识，CBETA 提供新式标点，其他

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
